

Na osnovu člana 63. i člana 65. Zakona o zdravstvenoj zaštiti («Službene novine FBiH» broj: 46/10, 75/13), člana 5. stav 1. Odluke o preuzimanju prava i obaveza osnivača i usklađivanju organizacije i poslovanja Javne ustanove Opća bolnica "Prim.dr. Abdulah Nakaš" («Službene novine Kantona Sarajevo» broj: 7/12 i 28/18), člana 46. Statuta Javne ustanove Opća bolnica "Prim.dr. Abdulah Nakaš Sarajevo" («Službene novine Kantona Sarajevo broj: 22/14), člana 36. Poslovnika o radu Upravnog odbora bolnice, Upravni odbor Javne ustanove Opća bolnica "Prim.dr. Abdulah Nakaš" Sarajevo na 14. (četnaestoj) redovnoj sjednici održanoj dana 31.07.2018. godine donosi :

O D L U K U
o izmjenama i dopunama Statuta Javne ustanove
Opća bolnica "Prim. dr Abdulah Nakaš" Sarajevo

Član 1.

U Statutu Javne ustanove Opća bolnica „Prim. dr Abdulah Nakaš“ («Službene novine Kantona Sarajevo broj: 22/14) u članu 13. u stavu (2) umjesto broja „330“ treba da stoji broj „345“ a iza tačke „d“ dodaje se nova tačka „e“ koja glasi:

„e) pedijatrija 15 postelja“.

Dosadašnje tačke e) i f) postaju tačke f) i g).

Član 2.

Odluka o izmjenama i dopunama Statuta Javne ustanove Opća bolnica " Prim.dr.Abdulah Nakaš " Sarajevo stupa na snagu danom donošenja od strane Upravnog odbora Ustanove, a primjenjuje se od dana dobivanja saglasnosti od strane Skupštine Kantona Sarajevo.

PRIPREMIO:
Samir Felah, dipl. iur.
Pomoćnik direktora za pravne
kadrovske i opće poslove



Broj: 24-124/18

Sarajevo, 31.07.2018. godine

Obrazloženje

I - PRAVNI OSNOV

- Pravni osnov za donošenje ove Odluke je sadržan u članu 63. i članu 65. Zakona o zdravstvenoj zaštiti („Službene novine Federacije BiH“ broj: 46/10 i 75/13), kojima je propisano da su akti zdravstvene ustanove Statut i drugi opći akti, a da je Statut osnovni opći akt zdravstvene ustanove, dok je u stavu (3) člana 63. Zakona propisano da Statut zdravstvene ustanove podliježe obaveznoj saglasnosti Osnivača. Članom 65. stav (1) tačka 1. istog Zakona propisano je da djelokrug upravnog odbora zdravstvenih ustanova u vlasništvu Federacije, jednog ili više kantona i Federacije zajedno, odnosno kantona ili općine podrazumijeva i donošenje Statuta zdravstvene ustanove.
- Članom 5. stav (1) Odluke o preuzimanju prava i obaveza osnivača i usklađivanju organizacije i poslovanja Javne ustanove Opća bolnica „Prim. dr. Abdulah Nakaš“ («Službene novine Kantona Sarajevo» broj: 7/12) regulisano je da je Statut osnovni opći akt Bolnice, koji donosi Upravni odbor uz obaveznu saglasnost Osnivača.
- Članom 55. Statuta Javne ustanove Opća bolnica „Prim. dr. Abdulah Nakaš“ propisano je da Upravni odbor donosi Statut kao i njegove izmjene i dopune uz saglasnost Osnivača.
- Članom 98. Zakona o zdravstvenoj zaštiti („Službene novine Federacije BiH“ broj: 46/10 i 75/13), propisano je da je Opća bolnica zdravstvena ustanova koja obavlja najmanje djelatnost hirurgije, interne medicine, pedijatrije, te ginekologije i porođajnog i ima posteljne, dijagnostičke i druge mogućnosti prilagođene svojoj namjeni.
- Odluka o izmjenama i dopunama Odluke o preuzimanju prava i obaveza osnivača i usklađivanju organizacije poslovanja Javne ustanove Opća bolnica „Prim. dr. Abdulah Nakaš“ («Službene novine Kantona Sarajevo» broj: 28/18)

II - RAZLOZI ZA DONOŠENJE ODLUKE

Razlozi za donošenje Odluke o izmjenama i dopunama Statuta Javne ustanove Opća bolnica „Prim.dr. Abdulah Nakaš“ broj: 24-124/18 koju je donio Upravni odbor ove Ustanove na 14. (četnaestoj) redovnoj sjednici održanoj 31.07. 2018. godine, su usklađivanje istog sa Zakonom o zdravstvenoj zaštiti („Službene novine Federacije BiH“, br. 46/10 i 75/13), kao i Izmjenama i dopunama Odluke o preuzimanju prava i obaveza osnivača i usklađivanju organizacije i poslovanja Javne ustanove Opća bolnica „Prim. dr. Abdulah Nakaš“ Sarajevo („Službene novine Kantona Sarajevo“ broj: 28/18).

Statut Javne ustanove Opća bolnica „Prim.dr. Abdulah Nakaš“ usvojen je na sjednici Upravnog odbora Javne ustanove Opća bolnica „Prim.dr. Abdulah Nakaš“ dana 09.12.2013. godine, a na isti je Skupština Kantona Sarajevo donijela Odluku o davanju saglasnosti, te je objavljen u Službenim novinama Kantona Sarajevo broj: 22/14.

III - OBRAZLOŽENJE PREDLOŽENIH PRAVNIH RJEŠENJA

U okviru Bolnice a u skladu sa normativnim aktima i rješenjem o registraciji Bolnice egzistira i radi Odjeljenje za ginekologiju i akušerstvo kao jedinica bolničke zdravstvene zaštite namijenjena je za pružanje usluga dijagnostike, konzervativnog i operativnog liječenja u oblasti ginekologije i akušerstva uključujući ginekologiju, patologiju trudnoće, akušerstvo i neonatologiju. Osnovne sastavne jedinice odjeljenja čine odsjeci namijenjeni za pružanje usluga u navedenim oblastima. Pored usluga dijagnostike liječenja unutar hospitalnih kapaciteta, timovi odjeljenja za ginekologiju i akušerstvo pružaju i specijalističko-konsultativnu zaštitu unutar pojedinih ambulanti i savjetovašta raspoređenih u jedinicama specijalističko-konsultativne zaštite za oblast ginekologije i akušerstva.

U okviru Odjeljenja vrše se izrada godišnjih izvještaja, plana rada i popune kadrova, izrada stručne literature kao i planova uposlenika za edukaciju i usavršavanje. Nadalje se također rade i vrše 24-časovni rad na Odjeljenju i putem dežurstva i u pripremi, te konsultativne ili konzilijarne preglede pacijenata kao i prevencija i nadzor nad pojavom intrahospitalnih infekcija, prati se parametar stope morbiditeta i mortaliteta kao i provođenje hirurških intervencija na istoimenom Odjeljenju. Osnovanost i utemeljenost osnivanja Odjela pedijatrije Javne ustanove Opća bolnica „Prim. dr. Abdulah Nakaš“ Sarajevo nalazimo u Zakonu o zdravstvenoj zaštiti („Službene novine Federacije BiH“, broj 46/10, 75/13), Naredbom o standardima normativima zdravstvene zaštite iz obaveznog zdravstvenog osiguranja u Federaciji BiH („Službeni novine Federacije BiH“ br. 82/14 i 107/14), u daljem tekstu Normativi i Pravilnikom o bližim uvjetima prostora, opreme i kadra za osnivanje i obavljanje zdravstvene djelatnosti u zdravstvenim ustanovama („Službene novine Federacije BiH“, broj 26/12) kao i Akreditacijskim standardima za bolnice 2010 (AKAZ), kojom se pobliže propisuju standardi i normativi zdravstvene zaštite, opća bolnica je zdravstvena ustanova koja obavlja najmanje djelatnost hirurgije, interne medicine, pedijatrije, ginekologije i porodiljstva i koja ima posteljne, dijagnostičke i druge mogućnosti prilagođene svojoj namjeni.

Takoder ističemo da je propisano Standardima i normativima sekundarne zdravstvene zaštite da isti obuhvataju :

- konsultativno-specijalističku djelatnost
- dijagnostičku djelatnost za vanbolničke pacijente
- djelatnost javnog zdravstva
- javnozdravstvenu djelatnost medicine rada

Kanton Sarajevo nema na adekvatan način uspostavljen sekundarni nivo pedijatrijske zdravstvene zaštite, koja prema Normativima mora biti formiran u općim bolnicama, kako bi iste ispunjavale standarde te pružile adekvatnu i kvalitetniju pedijatrijsku uslugu. Kako JU Opća bolnica „Prim. dr. Abdulah Nakaš“ nema uspostavljen pedijatrijski odjel ovim izmjenama i dopunama Statuta bolnice propisuje se obaveza osnivanje i obavljanje zdravstvene djelatnosti pedijatrije sekundarnog nivoa u Općoj bolnici „Prim.dr. Abdulah Nakaš“, Sarajevo.

Članom 2. Odluke definisano je stupanje na snagu iste.

IV – PRIJEDLOG ODLUKE SKUPŠTINE KANTONA SARAJEVO

Na osnovu izloženog, predlažemo Skupštini Kantona Sarajevo da donese Odluku o davanju saglasnosti na Odluku o izmjenama i dopunama Statuta javne ustanove Opća bolnica „Prim.dr. Abdulah Nakaš“, kao u predloženom tekstu.